



# BOLETÍN OFICIAL DO PARLAMENTO DE GALICIA

Número 247

VIII legislatura

8 de xuño de 2010

Fascículo 1

---

## SUMARIO

---

(Versión electrónica en [www.parlamentodegalicia.es](http://www.parlamentodegalicia.es))

### 1. Procedementos de natureza normativa

#### 1.2. Proxectos e proposicións de lei

##### 1.2.1. Proxectos de lei

Admisión a trámite, apertura do prazo de presentación de emendas e publicación do Proxecto de lei polo que se suprime o organismo autónomo Servizo Galego de Promoción da Igualdade do Home e da Muller e se modifican determinados artigos da Lei 2/2007, do 28 de marzo, do traballo en igualdade das mulleres de Galicia [- 08/PL-0012(36940)] [71391](#)

## 1. Procedementos de natureza normativa

### 1.2. Proxectos e proposicións de lei

#### 1.2.1. Proxectos de lei

**Admisión a trámite, apertura do prazo de presentación de emendas e publicación do Proxecto de lei polo que se suprime o organismo autónomo Servizo Galego de Promoción da Igualdade do Home e da Muller e se modifican determinados artigos da Lei 2/2007, do 28 de marzo, do traballo en igualdade das mulleres de Galicia**

A Mesa do Parlamento, na reunión do día 7 de xuño de 2010, adoptou o seguinte acordo:

Admisión a trámite, apertura do prazo de presentación de emendas e publicación:

- 08/PL-0012(36940)

Presidencia da Xunta de Galicia

Polo que se suprime o organismo autónomo Servizo Galego de Promoción da Igualdade do Home e da Muller e se modifican determinados artigos da Lei 2/2007, do 28 de marzo, do traballo en igualdade das mulleres de Galicia

Examinado o devandito proxecto de lei, e logo de verificar que reúne a documentación e os antecedentes previstos no artigo 111 do Regulamento, a Mesa, por unanimidade, acorda:

1.º) Admitir a trámite o devandito proxecto de lei polo procedemento lexislativo ordinario.

2.º) Oír a Xunta de Portavoces para a súa asignación á Comisión e ordenar a súa publicación no *Boletín Oficial do Parlamento de Galicia*.

3.º) Abrir o prazo regulamentario de 15 días hábiles para a presentación de emendas, que comezará a contar a partir do día seguinte ao da publicación no *Boletín Oficial do Parlamento de Galicia*. O prazo remata o día 25 de xuño de 2010, ás 18.30 horas.

Santiago de Compostela, 8 de xuño de 2010

Pilar Rojo Noguera

Presidenta



XUNTA DE GALICIA



CONSELLERÍA DE PRESIDENCIA,  
ADMINISTRACIÓNS PÚBLICAS  
E XUSTIZA

Dirección Xeral de Relacións Institucionais e Parlamentarias



XACOBEO 2010  
Galicia

RS/mv



Para a súa tramitación polo Parlamento de Galicia achégolle o **"Proxecto de lei polo que se suprime o organismo autónomo Servizo Galego de promoción da igualdade do home e da muller e se modifican determinados artigos da Lei 2/2007, do 28 de marzo, do traballo en igualdade das mulleres de Galicia"**, aprobado polo Consello da Xunta de Galicia na súa reunión do día 3 de maio de 2010.

Asemade achégase a certificación expedida polo secretario do Consello co visto e praxe do Sr. Presidente da Xunta de Galicia, así como os documentos aos que se refire o artigo 111 do Regulamento da Cámara.

Santiago de Compostela, 4 de maio de 2010

O director xeral de Relacións Institucionais e Parlamentarias



Excma. Sra. Presidenta do Parlamento de Galicia



XUNTA DE GALICIA

ALFONSO RUEDA VALENZUELA, CONSELLEIRO DE PRESIDENCIA,  
ADMINISTRACIÓNS PÚBLICAS E XUSTIZA E SECRETARIO DO  
CONSELLO DA XUNTA DE GALICIA

CERTIFICO:

Que o Consello da Xunta de Galicia na súa reunión do tres de xuño de dous mil dez adoptou, entre outros, o seguinte Acordo:

*“Aprobar o Proxecto de lei polo que se suprime o organismo autónomo Servizo Galego de promoción da igualdade do home e da muller e se modifican determinados artigos da Lei 2/2007, do 28 de marzo, do traballo en igualdade das mulleres de Galicia, e a súa remisión ao Parlamento de Galicia.”*

E para que conste asino esta certificación, co visto e prace do Sr. Presidente, en Santiago de Compostela o tres de xuño de dous mil dez.


Vº e Prace  
O PRESIDENTE





XUNTA DE GALICIA

**Proxecto de Lei polo que se suprime o Organismo Autónomo Servizo Galego de Promoción da Igualdade do Home e da Muller e se modifican determinados artigos da Lei 2/2007 do 28 de marzo do traballo en igualdade das mulleres de Galicia.**






## Exposición de motivos

O Estatuto de Autonomía de Galicia establece, no seu artigo 4.2, que lles corresponde aos poderes públicos de Galicia promover as condicións para que a liberdade e a igualdade do individuo e dos grupos en que se integra sexan reais e efectivas, remover os obstáculos que impidan ou dificulten a súa plenitude e facilitar a participación de todos os galegos e galegas na vida política, económica, cultural e social.

A Lei 3/1991, do 14 de xaneiro, creou o Servizo Galego de Igualdade do Home e da Muller como organismo autónomo dirixido á promoción e adopción de medidas encamiñadas á consecución da igualdade efectiva das mulleres e dos homes, removendo os obstáculos que impidan a participación e a integración da muller na vida social, cultural, educativa, económica e política de Galicia. O devandito organismo autónomo así creado estivo adscrito ás distintas consellerías de Traballo e Servizos Sociais, Familia e Promoción do Emprego, Muller e Xuventude, Familia, Xuventude, Deporte e Voluntariado, e á Vicepresidencia de Igualdade e do Benestar.

O Decreto 82/2009, do 21 de abril, establece os centros directivos dependentes da Presidencia da Xunta de Galicia, entre os que figura a Secretaría Xeral da Igualdade. No mesmo decreto establécese a adscrición á Presidencia do Organismo Autónomo Servizo Galego de Promoción da Igualdade do Home e da Muller.






O Decreto 325/2009, do 18 de xuño, de estrutura orgánica dos órganos superiores dependentes da Presidencia da Xunta de Galicia establece a dependencia funcional da Secretaría Xeral da Igualdade á Presidencia da Xunta e a dependencia orgánica á Consellería de Presidencia Administracións Públicas e Xustiza. Así mesmo, no seu artigo 1º.3 adscribe á Secretaría Xeral da Igualdade o organismo autónomo Servizo Galego de Promoción da Igualdade do Home e da Muller.


Como continuación do proceso de racionalización das estruturas administrativas parece convinte atribuír ao departamento da Administración Autónoma competente en materia de igualdade, e dentro deste en concreto á Secretaría Xeral da Igualdade, as funcións e competencias desenvolvidas ata agora polo citado organismo autónomo. Deste xeito, a Secretaría Xeral da Igualdade quedaría establecida como o órgano da Comunidade Autónoma de Galicia que aglutina os anteriormente existentes en materia de igualdade, dando así un novo empuje ás políticas autonómicas de igualdade de acordo coa experiencia acumulada que confirma que unha axeitada estrutura organizativa repercute de maneira directa nunha maior eficiencia e eficacia na aplicación das políticas de igualdade dirixidas á cidadanía. Asimesmo, esta nova estrutura servirá para aplicar con maior eficacia a transversalidade do principio de igualdade en todas as políticas e accións desenvolvidas pola Xunta de Galicia, de conformidade co artigo 6 da Lei 7/2004, galega para a igualdade de mulleres e homes.

Así a Secretaría Xeral da Igualdade asume como fins a eliminación da discriminación entre mulleres e homes, a promoción da igualdade e a erradicación dos prexuízos de xénero nos termos establecidos na Constitución, no Estatuto de Autonomía para Galicia, na Lei 7/2004, do 16 de xullo, para a igualdade de mulleres e homes, e na demais lexislación aplicable na materia.





As mesmas razóns de coordinación, eficacia administrativa e unidade na materia, que xustifican a supresión do organismo autónomo Servizo Galego de Promoción da Igualdade do Home e da Muller e a asunción das súas competencias pola Secretaría Xeral da Igualdade, aconsellan tamén a modificación de determinados artigos da Lei 2/ 2007 do 28 de marzo do traballo en igualdade das mulleres de Galicia, referentes ás medidas municipais de conciliación, e máis concretamente aos bancos municipais de tempo e aos plans de programación do tempo da cidade. A agrupación das principais competencias das políticas de igualdade dará lugar a unha maior eficacia e racionalidade na implantación das diferentes medidas tanto en materia de igualdade como de conciliación da vida persoal, familiar e laboral, pola estreita relación que existe entre o desenvolvemento das políticas de igualdade coas actuacións de conciliación e a progresiva incorporación en igualdade das mulleres.








**Artigo único-** *Supresión do Organismo Autónomo Servizo Galego de Promoción da Igualdade do Home e da Muller.*

1.-Suprímese o Organismo Autónomo Servizo Galego de Promoción da Igualdade do Home e da Muller.

2.-As funcións atribuídas ao Organismo Autónomo Servizo Galego de Promoción da Igualdade do Home e da Muller pola Lei 3/1991, do 14 de xaneiro, de creación do Servizo Galego de Promoción da Igualdade do Home e da Muller pasarán, á entrada en vigor da presente Lei, a ser desenvolvidas polo departamento da Administración Autónoma competente en materia de igualdade.





*Disposicións adicionais*

**Primeira.- Réxime de persoal**


O persoal que, a entrada en vigor da presente Lei, estivera prestando servizos no Servizo Galego de Promoción da Igualdade do Home e da Muller quedará adscrito ao departamento da Administración Autonómica competente en materia de igualdade.

Non obstante o anterior, os órganos competentes poderán efectuar as reasignacións de efectivos que procedan.

**Segunda.- Réxime patrimonial.**

1. Os bens do organismo autónomo suprimido e os adscritos para o cumprimento dos seus fins incorporaranse ao patrimonio da Comunidade Autónoma. A súa afectación e adscrición producirase de acordo co previsto na normativa aplicable en materia de patrimonio da Comunidade Autónoma galega.

2. A Comunidade Autónoma de Galicia subrógase na titularidade dos dereitos e obrigas do organismo autónomo Servizo Galego de Promoción da Igualdade do Home e da Muller.






*Disposición derogatoria*

**Única.-** *Derrogación normativa.*

1. Derrógase a Lei 3/1991, do 14 de xaneiro, de creación do Servizo Galego de Promoción da Igualdade do Home e da Muller.
2. Así mesmo, derróganse cantas disposicións de igual ou inferior rango se opoñan ao establecido nesta Lei.





*Disposicións derradeiras*

**Primeira.-** *Modificación da Lei 2/2007 do 28 de marzo do traballo en igualdade das mulleres de Galicia.*

Un.- Modifícase o artigo 7 que queda redactado do xeito seguinte:

Artigo 7:

“Unidade Administrativa de Igualdade.


A Unidade Administrativa de Igualdade do departamento da Administración Autónoma competente en materia de traballo, que terá como mínimo a categoría de servizo, estará coordinada co departamento da Administración Autónoma competente en materia de igualdade. Esta unidade estará dotada de persoal funcionario ou laboral con experiencia e formación acreditada en materia de igualdade entre mulleres e homes.”

Dous.- Modifícase o artigo 42 que queda redactado do xeito seguinte:

Artigo 42:

“ Promoción autónoma das medidas municipais de conciliación.

1. As medidas adoptadas polos concellos coa finalidade de facilitaren a conciliación da vida persoal, familiar e laboral das persoas traballadoras, constitúan ou non un plan local de conciliación, serán promovidas polo departamento da Administración Autónoma competente en materia de igualdade, en coordinación co departamento da Administración Autónoma competente en materia de traballo.





## XUNTA DE GALICIA

2. A promoción autonómica das medidas municipais de conciliación desenvolverase regulamentariamente, despois de ser oída a Federación Galega de Municipios e Provincias, e preverá a implantación de bancos municipais de tempo e plans de programación do tempo da cidade.

3. Os plans locais de conciliación executaranse buscando a colaboración entre as entidades locais e autonómica, nos termos convenientes, atendendo as particularidades de cada concello, para o que se habilitarán as axudas correspondentes.”

Tres.- Modifícase o artigo 46, que queda redactado do xeito seguinte:

Artigo 46:

“Medidas de apoio aos bancos municipais de tempo.


O departamento da Administración Autonómica competente en materia de igualdade, fomentará, en coordinación co departamento da Administración Autonómica competente en materia de traballo, a constitución de bancos municipais de tempo, habilitando as axudas correspondentes para a xestión, a organización, e a posta en marcha deles, de acordo co desenvolvemento regulamentario correspondente.”

Catro.- Modifícase o artigo 51, que queda redactado do xeito seguinte:

Artigo 51:

“Medidas de apoio aos plans de programación do tempo da cidade.

O departamento da Administración Autonómica competente en materia de igualdade fomentará, en coordinación co departamento da Administración Autonómica competente en materia de traballo, o establecemento de plans de






programación do tempo da cidade, de maneira especial se se implican varios concellos, para o que se habilitarán as axudas correspondentes, de acordo co desenvolvemento regulamentario correspondente.”

Cinco.- Modifícase a disposición derradeira primeira, que queda redactada do xeito seguinte:

Disposición derradeira primeira.

“Habilitación regulamentaria.


A Xunta de Galicia ditará cantas disposicións sexan necesarias para o desenvolvemento regulamentario desta Lei e facúltase ao departamento da Administración Autónoma competente en materia de traballo e ao departamento da Administración Autónoma competente en materia de igualdade, no ámbito das súas respectivas competencias, para ditar cantas disposicións sexan precisas para a súa aplicación. Facúltase en particular, ao departamento da Administración Autónoma competente en materia de traballo para elaborar, a través da correspondente orde, a lista das profesións nas que as mulleres galegas están subrepresentadas.”





**Segunda.- Referencias legislativas**

As referencias ao Organismo Autónomo Servizo Galego de Promoción da Igualdade do Home e da Muller contidas na lexislación vixente deberán entenderse referidas ao departamento da Administración Autónoma competente en materia de igualdade.






XUNTA DE GALICIA

*Terceira.-Título competencial*

Esta Lei dítase en exercicio das competencias contidas nos artigos 4.2 e 27.1 do Estatuto de Autonomía de Galicia.








XUNTA DE GALICIA

**Cuarta.- *Desenvolvemento normativo.***


A Xunta de Galicia ditará cantas disposicións sexan necesarias para o desenvolvemento regulamentario desta Lei e facúltase ao departamento da Administración Autonómica competente en materia de igualdade para ditar cantas disposicións sexan precisas para a súa aplicación.





**Quinta.- Dotacións orzamentarias**

Facúltase á persoa titular da Consellería de Facenda para ditar as disposicións necesarias para a xestión dos créditos afectados polas reformas contidas na presente Lei, así como para realizar as modificacións orzamentarias necesarias sen que en ningún caso poida orixinarse incremento de gasto.






*Sexta.-Entrada en vigor.*

Esta Lei entrará en vigor aos vinte días da súa publicación no *Diario Oficial de Galicia*.

Malia o previsto no parágrafo anterior, as prescricións contidas na disposición derradeira primeira da presente Lei producirán efectos a partir do 1 de xaneiro de 2011.

O Organismo Autónomo suprimido no artigo único desta Lei continuará desenvolvendo as súas competencias e funcións para o cumprimento dos seus fins, ata a entrada en vigor do Decreto da nova estrutura orgánica do departamento da Administración Autonómica competente en materia de igualdade.



Alfonso Rueda Valenzuela  
Conselleiro de Presidencia, Admón.  
Públicas e Xustiza.



## BOLETÍN OFICIAL DO PARLAMENTO DE GALICIA

Edición e subscricións: Servizo de Publicacións do Parlamento de Galicia.  
Hórreo, 63. 15702. Santiago de Compostela. Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727